

Sunday, July 12, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



CM ON RESULTS

Chief Minister Pu Lalduhoma chuan Mizoram University hnuai a kum 2026 Under Graduate Examresult chhuaka Graduate thar mi 3,512 te a lawmpui thu leh an kal zelna turah duhsakna a hlan.

Social media hmanga he thuchah hi sawiin Chief Minister chuan hlawhtling taka University Exam buatsaihtu Mizoram University chungah pawh lawmthu a sawi a. Mizoram chu India rama ziak leh chhiar thiam vekna state hmasa ber a ni tih sawiin, He dinhmun hi chhuanawm hle mah se hetah hian duh tawk mai lovin, zirna sang zawk lamah nasa zawka tan lak zel a pawimawh tih chu vawng reng turin zirlaite chu a chah a. India rama scientist leh mithiam ber berte hi Mizo nula leh tlangval han ni fur mai se, Mizoram leh Mizo hnam chu sang takah a leng dawn a ni, a ti.

Mizoram University hian Zirtawpni khan Under Graduate final (sixth) semester result a tichhuak a, exam 3,563 atangin graduate thar 3,512 an awm a ni.



CEO TRANSFERRED

Chief Electoral Officer (CEO) Pi Garima Gupta chu Mizoram atangin Delhi-ah sawn a ni.

CEO sawnna thupek hi Zirtawpni khan Ministry of Home Affairs in a tichhuak a. Election Commission of India (ECI) remtihna a sawn a nih leh nih loh hriat a la ni lo na a, Special Intensive Revision (SIR) kalpui vanglai tak a nih avangin ECI remtihna a sawn a nih rin a ni. Kum 2004 batch AGMUT cadre IAS officer Pi Gupta hi May ni 7 khan Mizoram CEO atana ruat a ni a, May ni 18 khan a hna a zawm a. A la awm rei lo na chungin Mizorama a awm hun hi a tawp tawh ni a sawi a awm bawk.

Pi Gupta sawn a nih rual hian Mizorama awm mek IPS officer 3, Pukhraj Kamal, Lokeswaran R leh Gaurav Tyagi te chu Delhi-ah sawn an ni a. IPS officer tho Delhi- a awm mek Direndra Pratap Singh, Nishant Gupta leh Amit Kaushik te chu Mizoramah rawn sawn an ni thung a ni.



HEALTH MINISTER

Health Minister Pi Lalrinpuui n nimin khan Kolkata khawpuiah Manipal Hospital, Broadway, Salt Lake leh Kalikata Road a awm Kolkata Kidney Institute te a tlawh.

Manipal Hospital, Broadway, Salt Lake a awm hi Superspeciality Hospital a ni a, Mizoram Sawrkar empanelled hospital a ni. Mizoram house, Salt Lake bul lawka awm niin, Mizoram atanga damlo kal ten an pan nasa in an tangkaipui hle a ni. Minister hian an facility neih hrang hrangte a hmunah a enpui bakah Mizoram atanga damlo awmte a kan nghal bawk. Manipal Hospital hian india ram pumpuiah Hospital 49 an nei mek a, chung zinga hospital 5 chu MUHCS hnuaia empanelled mek niin, India ramah chuan hospital nei tam leh tha ber te zinga mi a ni.

Health Minister hi Pi Kakali Mukherjee Unit Director leh a team te bakah Dr Smartha Pulai leh a team ten an lo dawngsawng a. Mizoram atanga damlo tam zawk an enkawl theih na’na hmalakna thar hrang hrang an neih te an lo hrilhfhiah a, damlo khumin a daih loh avanga day care centre an hawn belh atanga khum 35 chu Mizoram damlo tan bika an ruahman thu te an lo hrilh a ni. Tawnhriat nei Mizo nurse tam zawk thawk tura lak belh an duh reng thu te an sawi a, hemi chungchangah hian Minister chuan August thla chhunga recruitment buaipui tura lo zin turin a sawm bakah, Mizoram atanga damlote duat tak leh uluk taka an lo enkawl avangin lawmthu a hrilh sbawk a ni.

Hemi hnu hian Kal (kidney transplant) doctor experience rei tak nei tawh rualin an din - Kolkata Kidney Institute a tlawh a. Minister hi Dr. Pratik Das, Director, Dr. Keshab Sil, Senior Consultant, Dr Amar Pratap Singh,Consultant Nephrologist leh Pi Chaitali Das Pradhan, Nursing Superintendent te’n an lo dawngsawng ani. Kidney transplant lama experience nei tha tak tak doctor leh thawktuten man tlawm zawka kal thlak an kalpui dan te a hmunah an lo enpui a. He hospital hi Mizoram atanga damlo, kidney transplant mamawhte tana tangkai taka hman a nih theihna turin inbiak chhunzawm zel nise an ti a ni.

Damdawi-in a tlawh bakah hian Pi Lalrinpuii hi Zirtawpni khan West Bengal Health Minister thar - Dr Sharadwat Mukherjee nen an inkawm bawk a. Hriselna kawnga hmar chhak lam state hrang hrang ten tangruala hmalakho theih dan tur leh Minister te inhmuhkhawm theih dan tur kawng zawn ni se tha an tih thu an sawi dun a. West Bengal sawrkar in health insurance kalpui a tum thar dan tlangpui te lo hrilhin, mipui te tan MUHCS tha a tih thu te pawh a lo hrilh a ni.



PM RETURNS

Ram 3 tlawha zin chhuak, Prime Minister Narendra Modi-a chu New Delhi-ah a lo let leh tawh a, ni 6 thangin Indonesia, Australia leh New Zealand-ah te a zin a ni.

Indonesia President, Prabowo Subianto-an a sawm angin tun thla ni 6 atanga ni 8 inkar khan Indonesia hi a tlawh a, heta tang hian Australia-ah kalin Australia Prime Minister, Anthony Albanese-a nen India-Australia Annual Summit vawi 3-naah an tel a ni.

New Zealand Prime Minister, Christopher Luxon-an zin tura a sawm avangin July ni 10 atanga ni 11 inkar khan New Zealand a tlawh leh a, kum 40 chhunga New Zealand-a India Prime Minister zin hmasa ber a ni.

